

## ■ FORUM

## Reportaschas ord ils cuolms (1)

Vrin ei schi pauc Lumnezia sco Sizilia ei Italia. Il pievel da mia insla preferida, aschibein sco la glied dil vitg da miu cor, ha la medema tarlischur dils egl, lur cultura ei medem veglia e formada «ord il colorit de diversas nazions», sco mistral Gion Rest Solèr raschuna; ed omisdus pievels dian bia cun tschint-schar nuot. Ils ins han la mar avon casa e tschels las pastiras undegiontas. Mo en sesez ei quei il medem, dano che la mar ei radicalmein feminina, ferton che las pastiras han zatgei buca schi smantschond e mettan schizun empau sin punt ils cuolms savens malraschunevels, e masculins tochen leuo. Ils cuolms ein nossas piramidas. Las piramidas da ver aber statan per l'entschatta da nossa civilisaziun, las pastiras denton – e buca forsa nos cuolms, culs quals nus vein ditg buca saviu tgei entscheiver en – ein l'entschatta dalla cultura muntagnarda.

Quels maletgs ein i a mi tral tgeu a Vrin ella sala impressiunonta da *Gion Antoni C.*, nua ch'ils vischins eran serimnai la gievgia dils 12-11-15, duront ch'els vegnevan pervesi cun maletgs d'in chezer film inscenaus ord il helicopter, in roman-tissem alpin cun l'intenziun empau absurda da mussar a muntagnards dil 21avel tschentaner quei ch'els savevan gia, numnadamein tgei pèdra che lur cuntrada seigi.

Sin tribuna stattan tschun politichers sco sin spinas, flancai da sutsi dad in entir orchester dad experts dad ault carat. Tgei che quella illustra societad leva, suenter haver gudiu ina stupenta tscheina? Perschader ils vischins da regalar lur pastiras, lur mar, alla confederaziun. Empermess era ei vegniu ina sera d'informaziun «cun discuors aviert» davart dil reglament dil parc. Aber tgei discuor? Per ina fuvan mo proparcers vegni envidai sin tribuna e per l'atra fuva il reglament nun-surveseivel e caotic da quasi 400 paginas A4 accessibels sin la reit pèr dapi treis dis, aschia che negin veva giu temps da leger el seriusamein. Quei dil discuors ei lu era stau mo farsa. Ils emprems ¾ d'ura, pia quei temps che la glied era aunc frestga, han ils iniziants nezegiau per far propaganda, cun mussar cefras solemnas, cun far cumparegliazions fasierlias e cun slogans che dian nuot. Per exempel: dus cantuns, tschun regiuns, 17 vischnaucas, treis lungatgs. Sin tribuna vevan ei frili

aunc in quart lungatg ch'jeu hai in mument tertgau ch'jeu seigi el Yellowstone ell'America: ranger, monitoring, label, adventure, event, marketing, wilderness, fun, charta, win win, mister Adula.

Mei vess interessau, cun quei ch'jeu hai pertgirau 1473 dis nuorsas ella Greina e damai ch'jeu hai scret in cudisch sur da lufs e sun era per ti cun lezs, co ins pertgiri nuorsas en in parc, nua che luf ed uors gaudan protezzion absoluta. Forsa cun tgauns aggressivs che pertgiran dils lufs e dils quals ins sto puspei pertgiran ils turists che vegnan memia datier dallas nuorsas? Cun la risposta da pupi digl expert hai buca saviu entscheiver en bia, e cu jeu hai sefatg en che quel enconuscheva gnanc il territori da pasculaziun dallas nuorsas ch'el veva perimetrau, hai jeu calau da dumandar.

Quei che fatschentava plinavon la glied ei ch'ins astga buca bandunar il trutg ella zona centrala e ch'ins astga star eri e far pausa ella Greina sin territori Grischun sulettamein en dus loghens: a Pass Crap ed a Crap la Crusch. Beiber aua ord in dutg, ni schizun far bogn da peis, ni aunc mender: senudar en in laghet, ei scumandau. Vid la catscha midì ei, tenor *Sep Cathomas*, ella zona centrala nuot, quei che muossa ch'el ha buca legiu il reglament. Tenor lez vegn la catscha da capricorns limitada sin territori grischun da 100% sin 5% dalla surfatscha dalla zona centrala e la catscha da camutschs, che fuva – grazia a liungas contractivas cul cantun igl onn 2003 – sut certas circumstanziass lubida ella zona parziala da Val Canal, vegn scumandada dil tuttafatg. Las informaziuns da Cathomas ein fallidas.

Suenter lur part «ufficial» han certs politichers, che paran dad esser stai a scola tier Berlusconi, festginau da bagatellisar las reglas dalla «charta» e scutinai, tier vin e schambun, ellas ureglias als surstai vischins che quei cullas reglas seigi buca da prender aschi serius, quei negin che controllschì. Ils rangers hagian la funziun dad empalar e declarar e buca quella da castigiar, en quei senn hagian els plitost status da ragners. Sil podium fuva lu era gia vegniu constatau che la natira seigi protegida avunda, per gliez drovien ins buca parc, ei mondi cheu per survegnir in label. Ferventamein ei lu era nies cusseglier nazional staus en pil kleber. Pervia dil kleberli drovi ei la zona circumdonta, ella

quala nuot seigi scumandau. Detagl picant, buca menziunau: Avon 15 onns voteschan las vischnaucas dil Parc Naziunal Svizzer encunter l'ingrondaziun da quel. Daco? Per quei ch'ei han ell'Engiadina Bassa parc avunda e leschas tochen las ureglias.

Nies cusseglier ha lu plinavon empermess da star en pil tgaun e da mirar che quel astgi ir per trutg silmeins en corda, quei che ei stregn scumandau el Parc nazional. Pervia dils tgauns duess el aber buca duvra memia bia energia el parlament. Quei problem selai sliagar cun in tric: u prender quel el sacados, ni far ord el in luf.

In cusseglier duess s'engaschar a Berna per autras caussas: Far frunt p. ex. alla destrucziun sistematica da plazzas da lavur o silla tiara che la confederaziun ha praticau cun serrar gl'emprim ina staziun da viafier suenter l'atra ed ussa vinavon cun liquidar ina posta suenter l'atra e lu degradau ils postenents a pots che han da filar en lur autos mellens entuorn ch'ei vegnan blaus. Also mirar che las postas vegnan puspei aviartas ed aschia scaffir plazzas da lavur quei che alzass puspei la qualitat dalla posta e buca mo ils prezis exorbitants da porto (in pac da dus kg egl'exteriur cuosta denter 41 e 71 francs). Plinavon savess nies cusseglier nazional per exempel cumbatter per in tren spert e bus da posta express, che nus fussen per exempel da Vrin ni da Sedrun a Cuera en ina ura. Quei purtass zatgei alla regiun enstagl da semiar da visiuns alpinas. Quei da visiuns duess la politica schar sura alla baselgia catolica e tedlar sin Helmut Schmidt, in dils gronds ch'ella ha generau: «Wer Visionen hat, sollte zum Arzt gehen.»

Facit dalla sera tenor quei che tribuna ed experts han empruau da suggerir:

1. Il parc ha da far silpli sil pupi cun protezzion.
2. Nies futur dependa d'in kleber.
3. Quei culs scamonds ei pro fuorma e buca da prender serius.

La sala ei sesullanada. Ils vischins ein vegni pli perderts senza survegnir informaziuns. Cul sentiment ch'els vegnien pri serius ein els strusch i a casa. Anavos en la sala da G. A. Caminada ei stada l'impressiun segira – e quei ha da far cun la luschezia dils vers muntagnards – che ni daners ni bials films, che ni marendas ni savunems vegnien da menar Vrin davos la caz-zola.

Leo Tuor, Val Sumvig

## ■ PLAID PER LA DUMENGIA

## Bia avdonzas en casa dil Bab

DA SUR MARTIN BEARTH, MUSTÉR

Quella davosa dumengia egl onn ecclesiastic porta il tetel «Fiasta da Cristus Retg». Uss entscheiva lu il temps d'advent e da Nadal, in onn niev ella liturgia. Cristus Retg ei per nus, che vein dapi bia tschentaners bandischa il retgs da Cunclas oragiu, in patratg empau jester. Mo aschi libers da «retgs» sco nus quintein essan nus tuttina buca. Oz han quels «retgs» mo auters numns sco per ex. leschas e paragrafs, camonds e scamonds, formulars e prescripziuns etc. E tut quei vein nusezs decidiu en nossa democrazia.

Tut in auter retg ei Jesus. Sia lescha secloma semplamein: «Carezei in l'auter sco jeu hai carezau vus», ni: «Carezei il proxim sco sesezs». El pren serius scadin carstgaun, mintgin ei carezau dad el e duei era carezar sesez, duei pia esser pertscharts da sia dignitad e singularitad. Mintga carstgaun ha era in plaz, in'avdonza en casa dil Bab. Jesus di avon che ir a tschiel: «En casa da miu Bab ein bia avdonzas» ed el cuntinua: «Jeu mon a preparar in plaz per vus» (Gn 14, 1-6).

Co savein nus s'imaginar quell'avdonza? Co po quei esser, cu nus vein bandunau nossas avdonzas terrestras? La scribenta tudestga, Gisela Balthes, s'imaginescha quei sco suonda: «Jeu s'imagi-

neschel ina gronda casa, ella quala cristifidevels, muslims, hinduists e budists... avdeschan ensemen en tutta perinadad. Cheu ei plaz per tut las religiuns e confessiuns da tut il mund.

Tuttina eis ei buca tuttina per mei en tgeinina da quellas avdonzas che jeu vivel. Jeu crei ferma-mein ch'igl ei buca ina casualitad che jeu enquerel mia via tier Diu ella cumionza cristiana.

La cumionza, ella quala jeu sun Lnaschida e carschida si ei daventada mia patria cun nos rituals, nos survetschs divins, nos sacraments. Era sch'jeu frestgentass e remplazzas bugen enzacontas mobilies en quella avdonza, gnanc patratg'jeu d'extrar dad ella ni da midar casa.

Tonaton eis ei impurtont per mei da respectar il patertgar sur da Diu en las autras avdonzas e da viver en pasch cun lur carrents, aschia sco il patrun-casa, nies Diu e Bab, fa. El ha bia avdonzas e carezia senza cunfins. El spetga il medem da tut ils avdons da sia casa.»

Bia avdonzas e plaz per tots carstgauns da buna voluntad ha il Bab dil Cristus Retg. Quei ha Jesus mussau. El sez vul cumpignar nus sin la via tier siu e nies Bab. El ei gie la via, la verdad e la veta (Gn 14, 6).

## Brinzauls en moviment

■ (rtr) La costa da Brinzauls glischna uschè spert sco anc mai. Quai ha ditg Andri Largiader da l'uffizi da guaud e privels da la natira. 50 centimeters mintg'onn, uschè spert saja la costa anc mai glischnada. Il mument vegn la costa survegliada pli detagliadament. Ils resultats laschan vegnir l'uffi-

zi da guaud e privels da la natira tar la conclusiun da proponer al chantun da spustar la via chantunala che passa la zona da privel. L'uffizi chantunale da vias examinescha la proposta e decida co enavant. Il mument, uschè *Andri Largiader*, n'exista nagin privel acut da crudada da crappa.




FOTO A. BEELI

Tut ha siu temps:  
s'entupar e secapir,  
setener e carezar,  
schar liber e sereguardar.

Trests, mo plein carezia ed engrazievladad prendin nus cumiau da nossa cara mumma, sira, tatta, basatta ed amitga

## Veva Manetsch-Soliva

1. da fevrer 1918 – 30 d'october 2015

Ella ha astgau sedurmentar en pasch suenter ina veta liunga ed emplenida. Ella resta adina en nos cors.

Glattbrugg, il november 2015

Cornelia Geser e Christian Burger  
Evelina e Herbert Barth  
Maria-Luisa Manetsch  
Pius Arpagaus

Biadis: Natalie, Pascal, Cyrill, Marcel  
Sutbiadis: Lars, Tim, Enea, Valentina, Sascha, Sian, Sarina  
Parents, amitgas ed amitgs

La deposiziun dall'urna ha liug gievgia, ils 26 da november 2015, allas 13.30 sin il santeri Halden Opfikon-Glattbrugg. Suenter ha in survetsch divin liug ella baselgia catolica St. Anna.

Enstagl da fluras veglien ins sereguardar dalla fundaziun Vivendra, ad 8157 Dielsdorf, conto da schec postal 80-8892-2, cun la remarca «Gruppe Jade».

Adressa da malencurada: Cornelia Geser, Weinbergstrasse 68, 5000 Aarau